

U.P. SE BESTUURSKOOL NA 25 JAAR

Prof. C.W.I. PISTORIUS
Direkteur
Nagraadse Bestuurskool
Universiteit van Pretoria



Nagraadse bestuursopleiding aan die Universiteit van Pretoria is vanjaar 25 jaar oud. Die Instituut vir Bestuur en Administrasie het in 1949 die eerste keer nagraadse bestuursopleiding aangebied; tot in 1955 vir die M.Com. (B & A) graad en daarna vir die MBA.

Sedert 1949 is 527 meestergrade, 13 diplomas en 16 doktorsgrade in die Instituut toegeken. In 1973 is die Instituut omgeskep in 'n volwaardige en onafhanklike departement Bestuursweese wat die Nagraadse Bestuurskool asook die Buro vir Finansiële Aanlise huisves en wat oor 'n eie voltydse personeel beskik.

Die 25-jarige herdenking van die ontstaan van nagraadse bestuursopleiding aan die Universiteit van Pretoria is op 16 Augustus 1974 by wyse van 'n openbare seminaar met die tema 'Bestuur — Quo Vadis' gevier. Die referate wat op hierdie seminaar gelewer is, en wat in hierdie uitgawe van Bedryfsleiding gepubliseer is, is aktueel en ter sake.

Die betekenis van hierdie herdenking van 'n kwarteeu van nagraadse bestuursopleiding is vierledig. In die eerste plek is dit 'n bevestiging van die noue kontak wat die Bestuurskool met die sake-wêreld — binne en buite Suid-Afrika — wil hou. Die opleiding en navorsing van die Bestuurskool kan slegs betekenisvol wees indien dit op wedyrsydse kontak gebaseer is. In die tweede plek is dit 'n herdenking van dit wat reeds oor 25 jaar bereik is. Met ons herdenking bring ons hulde aan die pioniers wat nagraadse bestuursopleiding vir die eerste keer in Suid-Afrika aan die Universiteit van Pretoria ingestel het. Met ons herdenking bevestig ons ook ons trots op ons afgestudeerdes wat hulle plek in die Suid-Afrikaanse sakewêreld volstaan. In die derde plek is die herdenking 'n herbevestiging van die strewe van die Universiteit van Pretoria om bestuursopleiding aan te bied wat die

beste aan die steeds groeiende en steeds veranderende praktiese behoeftes van die Suid-Afrikaanse ekonomie sal voldoen.

Dit bly die doelwit van die Nagraadse Bestuurskool om aan elkeen wat oor bestuurspotensiaal beskik die opleiding aan te bied wat hulle in staat sal stel om die potensiaal betekenisvol en ten volle in bestuursposte te ontplooi. Hierdie doelwit word nagestreef deur die teoretiese gefundeerde maar pragmaties georiënteerde MBA program wat met ingang 1975 aangepas is tot 'n meer omvattende maar tog nog kompakte kursus. Dit word beplan om hierdie MBA program so spoedig moontlik ook op 'n voltydse basis aan te bied.

In die vierde plek was die herdenking 'n herbevestiging van die Nagraadse Bestuurskool se verantwoordelikheid teenoor sy oudstudente en die Suid-Afrikaanse sakewêreld in die algemeen. Die eksterne program van die Bestuurskool maak voorsiening vir gereelde kort-kursusse en seminare wat ten doel het om voortgesette bestuursopleiding waar en wanneer die behoefte bestaan te verskaf. Die interne MBA program kan uiteraard slegs tot 'n beperkte mate in die behoefte aan opgeleide bestuurders in Suid-Afrika voorsien. Die grootste behoefte aan prakties georiënteerde bestuursopleiding lê egter by die sakeman reeds in praktyk — veral in die kleiner en middelslag ondernemings dwarsdeur die land. Dit is ook in hierdie behoefte wat die Bestuurskool deur sy eksterne program wil voorsien.

Die Nagraadse Bestuurskool van die Universiteit van Pretoria gaan die volgende kwarteeu tegemoet met volle bewustheid van die taak wat dit het en die verantwoordelikhede wat daaruit voortspuit en die wil om hierdie taak ten beste te verrig en die verantwoordelikhede ten volle na te kom.